

四庫全書

史部

欽定四庫全書

繹史卷八十六之三

靈壁縣知縣馬驥撰

孔子類記三

刪述下

左傳

哀公

十四年春西狩於大野叔孫氏之車子鉏商獲

麟以為不祥以賜虞人仲尼觀之曰麟也然後取之

公羊傳何以書記異也何異爾非中國之獸也然則孰狩之薪采者也薪采者則微者也曷為以狩言之大之

也曷為大之為獲麟大之曷為為獲麟大之麟者仁獸
也有王者則至無王者則不至有以告者曰有麕而角
者孔子曰孰為來哉孰為來哉反袂拭面涕沾袍顏淵
死子曰噫天喪予子路死子曰噫天祝予西狩獲麟孔
子曰吾道窮矣春秋何以始乎隱祖之所逮聞也所見
異辭所聞異辭所傳聞異辭何以終乎哀十四年曰備
矣君子曷為為春秋撥亂世反諸正莫近諸春秋則未
知其為是與其諸君子樂道堯舜之道與末不亦樂乎

堯舜之知君子也制春秋之義以俟後聖以君子之為
亦有樂乎此也

穀梁傳引取之也狩地不地不狩也非狩而曰狩大獲
麟故大其適也其不言來不外麟於中國也其不言有
不使麟不恒於中國也

孔叢子叔孫氏之車子鉏商樵於野而獲獸焉衆莫之
識以為不祥棄之五父之衢冉有告夫子曰麇身而肉
角豈天之妖乎夫子曰今何在吾將觀焉遂往謂其御

高柴曰若求之言其必麟乎到視之果信言偃問曰飛者宗鳳走者宗麟為其難致也敢問今見其誰應之子曰天子布德將致太平則麟鳳龜龍先為之祥今宗周將滅天下無主孰為來哉遂泣曰予之於人猶麟之於獸也麟出而死吾道窮矣乃歌曰唐虞世兮麟鳳遊今

非其時來何求麟兮麟兮我心憂

琴操魯哀公十四年西狩薪者獲麟擊之

傷其左足將以示孔子孔子道與相逢見俛而泣抱麟曰爾孰為來哉孰為來哉反袂拭面仰視其人龍顏日角夫子奉麟之口須臾吐三卷圖一為赤伏劉季興為王二為周滅夫子將終三為漢制造作孝經夫子還謂

子夏曰新主將起其人如得麟者孝經右契孔子夜
夢三槐之間豐沛之邦有赤烟氣起乃呼顏淵子夏往
觀之驅車到楚西北范氏之街前芻兒捶麟傷其左前
足束薪而覆之孔子曰兒來汝姓為誰兒曰吾姓為赤
誦字時喬名受紀孔子曰汝豈有所見乎兒曰吾有所
見一禽如麇羊頭上有角其末有肉方以是西走孔子
曰天下已有主也為赤劉陳項為輔五星入井從歲星
見發薪下麟視孔子孔子趨而往麟茸其耳吐三卷圖
廣三寸長八寸每卷二十四字其言赤劉當起曰周亡
赤氣起大曜興玄丘制命帝卯金○荒謬春秋說題
辭得麟之月孔子謂子夏曰天當有血書魯端門子夏
往候之逢一郎言門有血往寫之云趣作法孔聖沒周
姬亡彗東出泰政起胡破術書記散孔不絕血書蜚為
赤鳥化為帛書署曰演孔圖中有作圖制法之狀春
秋演孔圖麟出周亡故作春秋制素王授當興也鳥
化為書孔子奉以告天赤雀集書上化為黃玉刻曰孔

提命作應法為制亦雀集孔子曰丘作春秋云受演
孔圖中有大王刻一版曰璇璣一低一昂是七期驗敗
毀滅之徵也
○緯書妄誕

史記子曰弗乎弗乎君子病沒世而名不稱焉吾道不
行矣吾何以自見於後世哉乃因史記作春秋上至隱
公下訖哀公十四年十二公據魯親周故殷運之三代
約其文辭而指博故吳楚之君自稱王而春秋貶之曰
子踐土之會實召周天子而春秋諱之曰天王狩於河
陽推此類以繩當世貶損之義後有王者舉而開之春

秋之義行則天下亂臣賊子懼焉孔子在位聽訟文辭
有可與人共者弗獨有也至於為春秋筆則筆削則削
子夏之徒不能贊一辭弟子受春秋孔子曰後世知丘
者以春秋而罪丘者亦以春秋 齊晉秦楚其在成周
微甚封或百里或五十里晉阻三河齊負東海楚介江
淮秦因雍州之固四國迭興更為伯主文武所褒大封
皆威而服焉是以孔子明王道干七十餘君莫能用故
西觀周室論史記舊聞興於魯而次春秋上記隱下至

哀之獲麟約其辭文去其煩重以制義法王道備人事
浹七十子之徒口受其傳指為有所刺譏褒諱挹損之
文辭不可以書見也魯君子左丘明懼弟子人人異端
各安其意失其真故因孔子史記具論其語成左氏春
秋春秋感精符孔子受端門之命制春秋之義使子夏等十四人求周史記得百二十國寶書九月經立
嚴氏春秋孔子將修春秋與左丘明乘如周觀書於周
史歸而修春秋之經丘明為之傳共為表裏孝經鈎命訣孔子作春秋二尺四寸之策書之孝經一尺二寸書之抱朴子仲尼春秋成紫微降光春秋演孔圖
孔子修春秋九月而成卜之得子曰吾欲載之空言不
陽豫之卦○宋均曰夏殷卦名

如見之於行事之深切著明也

春秋繁露仲尼之作春秋也上探正天端王公之位萬物民之所欲下明得失起賢才以待後聖故引史記理往事正是非也王公史記十二公之間皆衰世之事故門人惑孔子曰吾因其行事而加乎王心焉以為見之空言不如行事博深切故子貢閔子公肩子言其切而為國家資也其為切而至於殺君亡國奔走不得保社稷其所以然是皆不明於道不覽於春秋也故衛子夏

言有國家者不可不學春秋不學春秋則無以見前後
旁側之危則不知國之大柄君子重任也故或脅窮失
國擄殺於位一朝至爾苟能述春秋之法致行其道豈
徒除禍哉乃堯舜之德也

春秋握誠圖孔子作春秋陳
天人之際記異考符論衡

孔子之春秋素王之業也諸子之傳書素相之事也
淮南子春秋二百四十二年亡國五十二弑君三十六
采善鉏醜以成王道論亦博矣

春秋隱公元年春王正月三月公及邾儀父盟于蔑夏
五月鄭伯克段于鄆秋七月天王使宰咺來歸惠公仲

子之賄九月及宋人盟于宿冬十有二月祭伯來公子

益師卒

○凡邾公羊俱作邾婁
歲公羊穀梁並作昧

二年春公會戎于潛

夏五月莒人入向無駭帥師入極秋八月庚辰公及戎

盟于唐九月紀裂繻來逆女冬十月伯姬歸于紀紀子

帛莒子盟于密十有二月乙卯夫人子氏薨鄭人伐衛

○無駭穀梁作倅裂繻公穀
並作履綸帛公穀並作伯

三年春王二月己巳日

有食之三月庚戌天王崩夏四月辛卯君氏卒秋武氏

子來求賄八月庚辰宋公和卒冬十有二月齊侯鄭伯

盟于石門癸未葬宋穆公

○君氏公穀並作尹氏穆公穀並作繆

四年

春王二月莒人伐杞取牟婁戊申衛州吁弑其君完夏

公及宋公遇于清宋公陳侯蔡人衛人伐鄭秋翬帥師

會宋公陳侯蔡人衛人伐鄭九月衛人殺州吁于濮冬

十有二月衛人立晉

○州吁穀梁作祝吁

五年春公矢魚于棠

夏四月葬衛桓公秋衛師入郕九月考仲子之宮初獻

六羽邾人鄭人伐宋螟冬十有二月辛巳公子彊卒宋

人伐鄭圍長葛

○矢公穀並作觀郕公羊作盛後同

六年春鄭人來渝

平夏五月辛酉公會齊侯盟于艾秋七月冬宋人取長

葛

○渝公穀
並作輸

七年春王三月叔姬歸于紀滕侯卒夏

城中丘齊侯使其弟年來聘秋公伐邾冬天王使凡伯

來聘戎伐凡伯于楚丘以歸八年春宋公衛侯遇于

垂三月鄭伯使宛來歸祔庚寅我入祔夏六月巳亥蔡

侯考父卒辛亥宿男卒秋七月庚午宋公齊侯衛侯盟

于瓦屋八月葬蔡宣公九月辛卯公及莒人盟于浮來

螟冬十有二月無駭卒

○祔公穀並作邢浮
來公穀並作包來

九年春

天王使南季來聘三月癸酉大雨震電庚辰大雨雪挾

卒夏城郎秋七月冬公會齊侯于防

○挾公穀並作
佚防公羊作郚

十年春王二月公會齊侯鄭伯于中丘夏鞏帥師會齊

人鄭人伐宋六月壬戌公敗宋師于管辛未取郕辛巳

取防秋宋人衛人入鄭宋人蔡人衛人伐戴鄭伯伐取

之冬十月壬午齊人鄭人入郕

○戴公穀
並作載

十有一年

春滕侯薛侯來朝夏公會鄭伯于時來秋七月壬午公

及齊侯鄭伯入許冬十有一月壬辰公薨

○夏字下公
穀俱有五月

字時來公
羊作祁黎

桓公元年春王正月公即位三月公會鄭

伯于垂鄭伯以璧假許田夏四月丁未公及鄭伯盟于

越秋大水冬十月二年春王正月戊申宋督弑其君

與夷及其大夫孔父滕子來朝三月公會齊侯陳侯鄭

伯于穆以成宋亂夏四月取郕大鼎于宋戊申納于大

廟秋七月杞侯來朝蔡侯鄭伯會于鄧九月入杞公及

戎盟於唐冬公至自唐

○杞侯之杞
公穀並作紀

三年春正月公

會齊侯于贏夏齊侯衛侯胥命于蒲六月公會杞侯于

邲秋七月壬辰朔日有食之既公子翬如齊逆女九月齊侯送姜氏于謹公會齊侯于謹夫人姜氏至自齊冬

齊侯使其弟年來聘有年

○紀公羊作紀

四年春正月公狩

于郎夏天王使宰渠伯糾來聘

○是年缺秋冬二時

五年春正

月甲戌己丑陳侯鮑卒夏齊侯鄭伯如紀天王使仍叔

之子來聘葬陳桓公城祝丘秋蔡人衛人陳人從王伐

鄭大雩螽冬州公如曹

○仍穀梁作任螽公羊皆作螻

六年春正月

寔來夏四月公會紀侯于成秋八月壬午大閱蔡人殺

陳佗九月丁卯子同生冬紀侯來朝

○成穀梁作郕

七年春

二月己亥焚咸丘夏穀伯綏來朝鄧侯吾離來朝

○是年缺

秋冬二時

八年春正月己卯烝天王使家父來聘夏五月

丁丑烝秋伐邾冬十月雨雪祭公來遂逆王后于紀

九年春紀季姜歸于京師夏四月秋七月冬曹伯使其

世子射姑來朝十年春王正月庚申曹伯終生卒夏

五月葬曹桓公秋公會衛侯于挑丘弗遇冬十有二月

丙午齊侯衛侯鄭伯來戰於郎十有一年春正月齊

人衛人鄭人盟于惡曹夏五月癸未鄭伯寤生卒秋七月葬鄭莊公九月宋人執鄭祭仲突歸于鄭鄭忽出奔衛柔會宋公陳侯蔡叔盟于折公會宋公于夫鍾冬十

有二月公會宋公于闕

鍾公
羊作童

十有二年春正月夏

六月壬寅公會杞侯莒子盟于曲池秋七月丁亥公會宋公燕人盟于穀丘八月壬辰陳侯躍卒公會宋公于虛冬十有一月公會宋公于龜丙戌公會鄭伯盟于武父丙戌衛侯晉卒十有二月及鄭師伐宋丁未戰于宋

○杞公穀並作紀曲池公
羊作毆蛇虛公羊作鄭

十有三年春二月公會紀

侯鄭伯已巳及齊侯宋公衛侯燕人戰齊師宋師衛師

燕師敗績三月葬衛宣公夏大水秋七月冬十月十

有四年春正月公會鄭伯于曹無冰夏五鄭伯使其弟

語來盟秋八月壬申御廩災乙亥嘗冬十有二月丁巳

齊侯祿父卒宋人以齊人蔡人衛人陳人伐鄭○夏五

無月缺

文也語穀
梁作禦

十有五年春二月天王使冢父來求車三

月乙未天王崩夏四月已巳葬齊僖公五月鄭伯突出

奔蔡鄭世子忽復歸于鄭許叔入于許公會齊侯于艾

邾人牟人葛人來朝秋九月鄭伯突入于櫟冬十有一

月公會宋公衛侯陳侯于袤伐鄭

○艾公羊作鄩穀梁作蒿宋公上公羊有

齊侯袤公羊作侈

十有六年春正月公會宋公蔡侯衛侯于

曹夏四月公會宋公衛侯陳侯蔡侯伐鄭秋七月公至

自伐鄭冬城向十有一月衛侯朔出奔齊 十有七年

春正月丙辰公會齊侯紀侯盟于黃二月丙午公會邾

儀父盟于趯夏五月丙午及齊師戰于奚六月丁丑蔡

侯封人卒秋八月蔡季自陳歸于蔡癸巳葬蔡桓侯及

宋人衛人伐邾冬十月朔日有食之

公會邾儀父之會公穀俱作及奚

穀梁作郎

十有八年春王正月公會齊侯于濼公與夫人

姜氏遂如齊夏四月丙子公薨于齊丁酉公之喪至自

齊秋七月冬十有二月己丑葬我君桓公

公羊無與字桓公十八

年止四年春下有王其十四年春下無王

莊公元年春王正月三月夫人

孫于齊夏單伯逆王姬秋築王姬之館于外冬十月乙

亥陳侯林卒王使榮叔來錫桓公命王姬歸于齊齊師

遷紀邢鄧部 二年春王二月葬陳莊公夏公子慶父

帥師伐於餘丘秋七月齊王姬卒冬十有二月夫人姜

氏會齊侯于禚乙酉宋公馮卒

○禚公
羊作部

三年春王正

月溺會齊師伐衛夏四月葬宋莊公五月葬桓王秋紀

季以鄫入于齊冬公次于滑

○齊師穀梁作齊
人滑公穀並作郎

四年

春王二月夫人姜氏享齊侯于祝丘三月紀伯姬卒夏

齊侯陳侯鄭伯遇于垂紀侯大去其國六月乙丑齊侯

葬紀伯姬秋七月冬公及齊人狩于禚

○享公穀並作
饗禚公穀並作

部

五年春王正月夏夫人姜氏如齊師秋郕犂來來

朝冬公會齊人宋人陳人蔡人伐衛

○郕公羊作倪
犂公穀並作犂

六年春王正月王人子突救衛夏六月衛侯朔入于衛

秋公至自伐衛螟冬齊人來歸衛俘

○俘公穀
並作實

七年

春夫人姜氏會齊侯于防夏四月辛卯夜恒星不見夜

中星隕如雨秋大水無麥苗冬夫人姜氏會齊侯于穀

○辛卯夜之夜穀梁作
昔凡隕公羊皆作實

八年春王正月師次于郎以

俟陳人蔡人甲午治兵夏師及齊師圍邾邾降于齊師

秋師還冬十有一月癸未齊無知弑其君諸兒

○治公羊作祠

九年春齊人殺無知公及齊大夫盟於訛夏公伐齊

納子糾齊小白入於齊秋七月丁酉葬齊襄公八月庚

申及齊師戰于乾時我師敗績九月齊人取子糾殺之

冬浚洙

○訛公穀並作暨納子糾公穀皆無子字

十年春王正月公敗齊

師于長勺二月公侵宋三月宋人遷宿夏六月齊師宋

師次于郎公敗宋師于乘丘秋九月荊敗蔡師于莘以

蔡侯獻舞歸冬十月齊師滅譚譚子奔莒

○舞穀梁作武

十

有一年春王正月夏五月戊寅公敗宋師於鄆秋宋大水冬王姬歸于齊 十有二年春王三月紀叔姬歸于

鄆夏四月秋八月甲午宋萬弑其君捷及其大夫仇牧

冬十月宋萬出奔陳

捷公羊作接

十有三年春齊侯宋人

陳人蔡人邾人會于北杏夏六月齊人滅遂秋七月冬

公會齊侯盟于柯

春齊侯之侯穀梁作人

十有四年春齊人陳

人曹人伐宋夏單伯會伐宋秋七月荆入蔡冬單伯會

齊侯宋公衛侯鄭伯于鄆 十有五年春齊侯宋公陳

侯衛侯鄭伯會于鄆夏夫人姜氏如齊秋宋人齊人邾

人伐邾鄭人侵宋冬十月

○鄭公羊作兒

十有六年春王正

月夏宋人齊人衛人伐鄭秋荆伐鄭冬十有二月會齊

侯宋公陳侯衛侯鄭伯許男滑伯滕子同盟于幽邾子

克卒

○會公羊作公會許男下公穀並有曹伯

十有七年春齊人執鄭詹

夏齊人殲于遂秋鄭詹自齊逃來冬多麋

○詹公羊作瞻殲公羊作

殲

十有八年春王三月日有食之夏公追戎于濟西

秋有戡冬十月

十有九年春王正月夏四月秋公子

結媵陳人之婦于鄆遂及齊侯宋公盟夫人姜氏如莒

冬齊人宋人陳人伐我西鄙 二十年春王二月夫人

姜氏如莒夏齊大災秋七月冬齊人伐我

○戎穀
梁作我

二

十有一年春王正月夏五月辛酉鄭伯突卒秋七月戊

戌夫人姜氏薨冬十有二月葬鄭厲公 二十有二年

春王正月肆大眚癸丑葬我小君文姜陳人殺其公子

御寇夏五月秋七月丙申及齊高傒盟于防冬公如齊

納幣

○魯公羊作省
御公穀並作禦

二十有三年春公至自齊祭叔

來聘夏公如齊觀社公至自齊荆人來聘公及齊侯遇
于穀蕭叔朝公秋丹桓宮楹冬十有一月曹伯射姑卒
十有二月甲寅公會齊侯盟于扈二十有四年春王
三月刻桓宮桷葬曹莊公夏公如齊逆女秋公至自齊
八月丁丑夫人姜氏入戊寅大夫宗婦覲用幣大水冬
戎侵曹曹羈出奔陳赤歸于曹郭公○郭公
闕文二十有
五年春陳侯使女叔來聘夏五月癸丑衛侯朔卒六月
辛未朔日有食之鼓用牲于社伯姬歸于杞秋大水鼓

用牲于社于門冬公子友如陳 二十有六年春公伐
戎夏公至自伐戎曹殺其大夫秋公會宋人齊人伐徐
冬十有二月癸亥朔日有食之 二十有七年春公會
杞伯姬于洮夏六月公會齊侯宋公陳侯鄭伯同盟于
幽秋公子友如陳葬原仲冬杞伯姬來莒慶來逆叔姬
杞伯來朝公會齊侯于城濮 二十有八年春王三月
甲寅齊人伐衛衛人及齊人戰衛人敗績夏四月丁未
邾子瑱卒秋荊伐鄭公會齊人宋人救鄭冬築郿大無

麥禾臧孫辰告糴于齊

鄆公穀並作微

二十有九年春新

延廩夏鄭人侵許秋有蜚冬十有二月紀叔姬卒城諸

及防三十年春王正月夏次于成秋七月齊人降鄆

八月癸亥葬紀叔姬九月庚午朔日有食之鼓用牲于

社冬公及齊侯遇于魯濟齊人伐山戎

次于成上公穀皆有師字

三十有一年春築臺于郎夏四月薛伯卒築臺于薛

六月齊侯來獻戎捷秋築臺于秦冬不雨三十有二

年春城小穀夏宋公齊侯遇于梁丘秋七月癸巳公子

牙卒八月癸亥公薨于路寢冬十月己未子般卒公子

慶父如齊狄伐邢

○己未公穀並作乙未

閔公元年春王正月

齊人救邢夏六月辛酉葬我君莊公秋八月公及齊侯

盟於落姑季子來歸冬齊仲孫來

○落公穀並作洛

二年春

王正月齊人遷陽夏五月乙酉吉禘于莊公秋八月辛

丑公薨九月夫人姜氏孫于邾公子慶父出奔莒冬齊

高子來盟十有二月狄入衛鄭棄其師僖公元年春

王正月齊師宋師曹伯次于聶北救邢夏六月邢遷于

夷儀齊師宋師曹師城邢秋七月戊辰夫人姜氏薨于
夷齊人以歸楚人伐鄭八月公會齊侯宋公鄭伯曹伯
邾人于榿九月公敗邾師于偃冬十月壬午公子友帥
師敗莒師于鄆獲莒挐十有二月丁巳夫人氏之喪至

自齊

○曹伯公穀並作曹師夷儀公羊作陳儀榿公
羊作打偃公羊作纓鄆公羊作犂穀梁作麗

二年春王正月城楚丘夏五月辛巳葬我小君哀姜虞
師晉師滅下陽秋九月齊侯宋公江人黃人盟于貫冬
十月不雨楚人侵鄭

○下陽公穀並作夏
陽貫公羊作貫澤

三年春王

正月不雨夏四月不雨徐人取舒六月雨秋齊侯宋公

江人黃人會于陽穀冬公子友如齊涖盟楚人伐鄭

穀○

梁作公子季友凡
涖公穀並作蒞

四年春王正月公會齊侯宋公陳

侯衛侯鄭伯許男曹伯侵蔡蔡潰遂伐楚次于陘夏許

男新臣卒楚屈完來盟于師盟于召陵齊人執陳轅濤

塗秋及江人黃人伐陳八月公至自伐楚葬許穆公冬

十有二月公孫茲帥師會齊人宋人衛人鄭人許人曹

人侵陳

○轅公穀並作袁凡穆公羊
皆作繆茲公羊作慈後同

五年春晉侯殺

其世子申生杞伯姬來朝其子夏公孫茲如牟公及齊侯宋公陳侯衛侯鄭伯許男曹伯會王世子于首止秋八月諸侯盟于首止鄭伯逃歸不盟楚人滅弦弦子奔黃九月戊申朔日有食之冬晉人執虞公

○首止公穀並作首戴

六年春王正月夏公會齊侯宋公陳侯衛侯曹伯伐鄭圍新城秋楚人圍許諸侯遂救許冬公至自伐鄭

七年春齊人伐鄭夏小邾子來朝鄭殺其大夫申侯秋七月公會齊侯宋公陳世子款鄭世子華盟于甯母曹

伯班卒公子友如齊冬葬曹昭公

○凡小邾公羊俱作小邾婁寧穀梁作寧

班公羊作般

八年春王正月公會王人齊侯宋公衛侯許

男曹伯陳世子款盟于洮鄭伯乞盟夏狄伐晉秋七月

禘于大廟用致夫人冬十有二月丁未天王崩

○陳世子款下

公羊有鄭世子華

九年春王三月丁丑宋公御說卒夏公會

宰周公齊侯宋子衛侯鄭伯許男曹伯于葵丘秋七月

乙酉伯姬卒九月戊辰諸侯盟于葵丘甲子晉侯倬諸

卒冬晉里克殺其君之子奚齊

○御公穀並作禦甲子公羊作甲戌倬公穀並

作詭殺公
羊作弑

十年春王正月公如齊狄滅溫溫子奔衛

晉里克弑其君卓及其大夫荀息夏齊侯許男伐北戎

晉殺其大夫里克秋七月冬大雨雪

○君卓公羊作君卓子

十

有一年春晉殺其大夫平鄭父夏公及夫人姜氏會齊

侯于陽穀秋八月大雩冬楚人伐黃十有二年春王

三月庚午日有食之夏楚人滅黃秋七月冬十有二月

丁丑陳侯杵臼卒

○杵公羊作處

十有三年春秋侵衛夏四

月葬陳宣公公會齊侯宋公陳侯衛侯鄭伯許男曹伯

于鹹秋九月大雩冬公子友如齊 十有四年春諸侯

城緣陵夏六月季姬及鄆子遇于防使鄆子來朝秋八

月辛卯沙鹿崩狄侵鄭冬蔡侯貍卒

○鄆穀梁皆作繒

十有

五年春王正月公如齊楚人伐徐三月公會齊侯宋公

陳侯衛侯鄭伯許男曹伯盟于牡丘遂次于匡公孫敖

帥師及諸侯之大夫救徐夏五月日有食之秋七月齊

師曹師伐厲八月螽九月公至自會季姬歸于鄆己卯

晦震夷伯之廟冬宋人伐曹楚人敗徐于婁林十有一

月壬戌晉侯及秦伯戰于韓獲晉侯

○帥公
羊作率

十有六

年春王正月戊申朔隕石于宋五是月六鷁退飛過宋

都三月壬申公子季友卒夏四月丙申鄆季姬卒秋七

月甲子公孫茲卒冬十有二月公會齊侯宋公陳侯衛

侯鄭伯許男邢侯曹伯于淮

○鷁穀
梁作鷁

十有七年春齊

人徐人伐英氏夏滅項秋夫人姜氏會齊侯于卞九月

公至自會冬十有二月乙亥齊侯小白卒 十有八年

春王正月宋公曹伯衛人邾人伐齊夏師救齊五月戊

寅宋師及齊師戰于甌齊師敗績狄救齊秋八月丁亥

葬齊桓公冬邢人狄人伐衛

○宋公下公
羊有會字

十有九年

春王三月宋人執滕子嬰齊夏六月宋公曹人邾人盟

于曹南鄆子會盟于邾己酉邾人執鄆子用之秋宋人

圍曹衛人伐邢冬會陳人蔡人楚人鄭人盟于齊梁亡

○宋公公羊作宋人會
陳人公羊會上有公字

二十年春新作南門夏鄆子

來朝五月乙巳西宮災鄭人入滑秋齊人狄人盟于邢

冬楚人伐隨 二十有一年春狄侵衛宋人齊人楚人

盟于鹿上夏大旱秋宋公楚子陳侯蔡侯鄭伯許男曹

伯會于孟執宋公以伐宋冬公伐邾楚人使宜申來獻

捷十有二月癸丑公會諸侯盟於薄釋宋公

○孟公羊作霍穀梁

作雩二十有二年春公伐邾取須句夏宋公衛侯許男

滕子伐鄭秋八月丁未及邾人戰于升陘冬十有一月

己巳朔宋公及楚人戰于泓宋師敗績

○句公羊作胸

二十

有三年春齊侯伐宋圍緡夏五月庚寅宋公茲父卒秋

楚人伐陳冬十有一月杞子卒

○緡穀梁作閔下同茲公羊作慈

二

十有四年春王正月夏秋伐鄭秋七月冬天王出居于
鄭晉侯夷吾卒 二十有五年春王正月丙午衛侯燬
滅邢夏四月癸酉衛侯燬卒宋蕩伯姬來逆婦宋殺其
大夫秋楚人圍陳納頓子于頓葬衛文公冬十有二月
癸亥公會衛子莒慶盟于洮 二十有六年春王正月
己未公會莒子衛甯速盟于向齊人侵我西鄙公追齊
師至鄆弗及夏齊人伐我北鄙衛人伐齊公子遂如楚
乞師秋楚人滅夔以夔子歸冬楚人伐宋圍緡公以楚

師伐齊取穀公至自伐齊

○甯速公羊作邈鄒公羊作
雋穀梁作雋夔公羊作隗

二十有七年春杞子來朝夏六月庚寅齊侯昭卒秋

八月乙未葬齊孝公乙巳公子遂帥師入杞冬楚人陳

侯蔡侯鄭伯許男圍宋十有二月甲戌公會諸侯盟于

宋二十有八年春晉侯侵曹晉侯伐衛公子買戍衛

不卒戍刺之楚人救衛三月丙午晉侯入曹執曹伯畀

宋人夏四月己巳晉侯齊師宋師秦師及楚人戰于城

濮楚師敗績楚殺其大夫得臣衛侯出奔楚五月癸丑

公會晉侯齊侯宋公蔡侯鄭伯衛子莒子盟于踐土陳
侯如會公朝于王所六月衛侯鄭自楚復歸于衛衛元
咺出奔晉陳侯款卒秋杞伯姬來公子遂如齊冬公會
晉侯齊侯宋公蔡侯鄭伯陳子莒子邾子秦人于溫天
王狩于河陽壬申公朝于王所晉人執衛侯歸之于京
師衛元咺自晉復歸于衛諸侯遂圍許曹伯襄復歸于
曹遂會諸侯圍許

○狩穀
梁作守

二十有九年春介葛盧來

公至自圍許夏六月會王人晉人宋人齊人陳人蔡人

秦人盟于翟泉秋大雨雹冬介葛盧來

○會上公穀皆有公宇翟公羊

作狄

三十年春王正月夏狄侵齊秋衛殺其大夫元咺

及公子瑕衛侯鄭歸于衛晉人秦人圍鄭介人侵蕭冬
天王使宰周公來聘公子遂如京師遂如晉 三十有
一年春取濟西田公子遂如晉夏四月卜郊不從乃
免牲猶三望秋七月冬杞伯姬來求婦狄圍衛十有二
月衛遷于帝丘 三十有二年春王正月夏四月己丑
鄭伯捷卒衛人侵狄秋衛人及狄盟冬十有二月己卯

晉侯重耳卒

○捷公羊作接

三十有三年春王二月秦人入

滑齊侯使國歸父來聘夏四月辛巳晉人及姜戎敗秦師于殽癸巳葬晉文公狄侵齊公伐邾取訾婁秋公子遂帥師伐邾晉人敗狄于箕冬十月公如齊十有二月公至自齊乙巳公薨于小寢隕霜不殺草李梅實晉人陳人鄭人伐許

○敗秦下公羊無師字

文公元年春王正月公

即位二月癸亥日有食之王使叔服來會葬夏四月丁巳葬我君僖公天王使毛伯來錫公命晉侯伐衛叔

孫得臣如京師衛人伐晉秋公孫敖會晉侯于戚冬十

月丁未楚世子商臣弑其君頹公孫敖如齊

○公羊曰上有朔字

二年春王二月甲子晉侯及秦師戰于彭衙秦師敗

績丁丑作僝公主三月乙巳及晉處父盟夏六月公孫

敖會宋公陳侯鄭伯晉士穀盟于垂隴自十有二月不

雨至于秋七月八月丁卯大事于大廟躋僝公冬晉人

宋人陳人鄭人伐秦公子遂如齊納幣

○穀穀梁作穀隴公穀並作欽

三年春王正月叔孫得臣會晉人宋人陳人衛人鄭

人伐沈沈潰夏五月王子虎卒秦人伐晉秋楚人圍江
雨螽于宋冬公如晉十有二月己巳公及晉侯盟晉陽
處父帥師伐楚以救江

○公穀俱無以字

四年春公至自晉

夏逆婦姜于齊狄侵齊秋楚人滅江晉侯伐秦衛侯使
甯俞來聘冬十有一月壬寅夫人風氏薨 五年春王

正月王使榮叔歸含且贈三月辛亥葬我小君成風王
使召伯來會葬夏公孫敖如晉秦人入郟秋楚人滅六

冬十月甲申許男業卒

○召伯穀梁作毛伯

六年春葬許僖公

夏季孫行父如陳秋季孫行父如晉八月乙亥晉侯驩卒冬十月公子遂如晉葬晉襄公晉殺其大夫陽處父

晉狐射姑出奔狄閏月不告月猶朝于廟

驩公羊作謹射穀梁作

夜或如字

七年春公伐邾三月甲戌取須句遂城郕夏四

月宋公王臣卒宋人殺其大夫戊子晉人及秦人戰于

令狐晉先蔑奔秦狄侵我西鄙秋八月公會諸侯晉大

夫盟于扈冬徐伐莒公孫敖如莒泣盟

句公羊作胸王臣穀梁作壬

臣蔑公羊作昧奔上有以師二字

八年春王正月夏四月秋八月戊

申天王崩冬十月壬午公子遂會晉趙盾盟于衡雍乙

酉公子遂會雒戎盟于暴公孫敖如京師不至而復丙

戌奔莒螽宋人殺其大夫司馬宋司城來奔

○雒戎上公羊有伊

字不至下公羊無而字

九年春毛伯來求金夫人姜氏如齊二

月叔孫得臣如京師辛丑葬襄王晉人殺其大夫先都

三月夫人姜氏至自齊晉人殺其大夫士穀及箕鄭父

楚人伐鄭公子遂會晉人宋人衛人許人救鄭夏狄侵

齊秋八月曹伯襄卒九月癸酉地震冬楚子使椒來聘

秦人來歸僖公成風之祔葬曹共公

○椒穀
梁作萩

十年春

王三月辛卯臧孫辰卒夏秦伐晉楚殺其大夫宜申自

正月不雨至于秋七月及蕪子盟于女栗冬狄侵宋楚

子蔡侯次于厥貉

○厥公
羊作屈

十有一年春楚子伐麋夏

叔仲彭生會晉郤缺于承匡秋曹伯來朝公子遂如宋

狄侵齊冬十月甲午叔孫得臣敗狄于鹹

○麋公羊作
圖叔仲公穀

俱無
仲字

十有二年春王正月邾伯來奔杞伯來朝二月

庚子子叔姬卒夏楚人圍巢秋滕子來朝秦伯使術來

聘冬十有二月戊午晉人秦人戰于河曲季孫行父帥

師城諸及鄆

○衍公羊作遂凡鄆公羊皆作運

十有三年春王正月

夏五月壬午陳侯朔卒邾子蘧蒢卒自正月不雨至于

秋七月大室屋壞冬公如晉衛侯會公于沓狄侵衛十

有二月己丑公及晉侯盟公還自晉鄭伯會公于斐○蘧

蒢穀梁作蘧蒢大室公羊作世室衛侯會下公羊無公字斐公羊作斐

十有四年春王

正月公至自晉邾人伐我南鄙叔彭生帥師伐邾夏五月乙亥齊侯潘卒六月公會宋公陳侯衛侯鄭伯許男

曹伯晉趙盾癸酉同盟于新城秋七月有星孛入于北斗公至自會晉人納捷菑于邾弗克納九月甲申公孫敖卒于齊齊公子商人弑其君舍宋子哀來奔冬單伯如齊齊人執單伯齊人執子叔姬○捷公羊作接十有五年

春季孫行父如晉三月宋司馬華孫來盟夏曹伯來朝齊人歸公孫敖之喪六月辛丑朔日有食之鼓用牲于社單伯至自齊晉卻缺帥師伐蔡戊申入蔡秋齊人侵我西鄙季孫行父如晉冬十有一月諸侯盟于扈十有

二月齊人來歸子叔姬齊侯侵我西鄙遂伐曹入其郭

十有六年春季孫行父會齊侯于陽穀齊侯弗及盟

夏五月公四不視朔六月戊辰公子遂及齊侯盟于鄆

丘秋八月辛未夫人姜氏薨毀泉臺楚人秦人巴人滅

庸冬十有一月宋人弑其君杵臼

○鄆公羊作犀穀梁作師杵公羊作處

十有七年春晉人衛人陳人鄭人伐宋夏四月癸亥

葬我小君聲姜齊人伐我西鄙六月癸未公及齊侯盟

于穀諸侯會于扈秋公至自穀冬公子遂如齊

○聲公羊作聖

十有八年春王二月丁丑公薨于臺下秦伯瑩卒夏五月戊戌齊人弑其君商人六月癸酉葬我君文公秋公子遂叔孫得臣如齊冬十月子卒夫人姜氏歸于齊季孫行父如齊莒弑其君庶其宣公元年春王正月公即位公子遂如齊逆女三月遂以夫人婦姜至自齊夏季孫行父如齊晉放其大夫胥甲父于衛公會齊侯于平州公子遂如齊六月齊人取濟西田秋邾子來朝楚子鄭人侵陳遂侵宋晉趙盾帥師救陳宋公陳侯衛

侯曹伯會晉師于棐林伐鄭冬晉趙穿帥師侵崇晉人

宋人伐鄭

○裴公羊作斐崇公羊作柳

二年春王二月壬子宋華

元帥師及鄭公子歸生帥師戰于大棘宋師敗績獲宋

華元秦師伐晉夏晉人衛人陳人侵鄭秋九月乙

丑晉趙盾弑其君夷臯冬十月乙亥天王崩

○臯公羊作獬

三年春王正月郊牛之口傷改卜牛牛死乃不郊猶三

望葬匡王楚子伐陸渾之戎夏楚人侵鄭秋赤狄侵齊

宋師圍曹冬十月丙戌鄭伯蘭卒葬鄭穆公

○陸渾公羊作賁渾

公穀戎上俱無之字

四年春王正月公及齊侯平莒及郟莒人

不肯公伐莒取向秦伯稻卒夏六月乙酉鄭公子歸生

弑其君夷赤狄侵齊秋公如齊公至自齊冬楚子伐鄭

五年春公如齊夏公至自齊秋九月齊高固來逆叔

姬叔孫得臣卒冬齊高固及子叔姬來楚人伐鄭

○逆字下

公穀俱有子字

六年春晉趙盾衛孫免侵陳夏四月秋八月

螽冬十月七年春衛侯使孫良夫來盟夏公會齊侯

伐萊秋公至自伐萊大旱冬公會晉侯宋公衛侯鄭伯

曹伯于黑壤 八年春公至自會夏六月公子遂如齊

至黃乃復辛巳有事于大廟仲遂卒于垂壬午猶繹萬

入去籥戊子夫人嬴氏薨晉師白狄伐秦楚人滅舒蓼

秋七月甲子日有食之既冬十月己丑葬我小君敬嬴

雨不克葬庚寅日中而克葬城平陽楚師伐陳○嬴氏公穀並

作熊氏蓼穀梁作邾敬嬴公穀並作頃熊 九年春王正月公如齊公至自

齊夏仲孫蔑如京師齊侯伐萊秋取根牟八月滕子卒

九月晉侯宋公衛侯鄭伯曹伯會于扈晉荀林父帥師

伐陳辛酉晉侯黑臀卒于扈冬十月癸酉衛侯鄭卒宋人圍滕楚子伐鄭晉卻缺帥師救鄭陳殺其大夫洩冶

○洩公穀
並作泄

十年春公如齊公至自齊齊人歸我濟西

田夏四月丙辰日有食之己巳齊侯元卒齊崔氏出奔衛公如齊五月公至自齊癸巳陳夏徵舒弑其君平國六月宋師伐滕公孫歸父如齊葬齊惠公晉人宋人衛人曹人伐鄭秋天王使王季子來聘公孫歸父帥師伐邾取繹大水季孫行父如齊冬公孫歸父如齊齊侯使

國佐來聘饑楚子伐鄭

○繹公
羊作類

十有一年春王正月

夏楚子陳侯鄭伯盟于辰陵公孫歸父會齊人伐莒秋

晉侯會狄于欒函冬十月楚人殺陳夏徵舒丁亥楚子

入陳納公孫寧儀行父于陳

○辰陵穀梁作夷
陵寧公羊作甯

十有

二年春葬陳靈公楚子圍鄭夏六月乙卯晉荀林父帥

師及楚子戰于邲晉師敗績秋七月冬十有二月戊寅

楚子滅蕭晉人宋人衛人曹人同盟于清丘宋師伐陳

衛人救陳十有三年春齊師伐莒夏楚子伐宋秋螽

冬晉殺其大夫先穀

穀穀梁作穀

十有四年春衛殺其大

夫孔達夏五月壬申曹伯壽卒晉侯伐鄭秋九月楚子

圍宋葬曹文公冬公孫歸父會晉侯于穀 十有五年

春公孫歸父會楚子于宋夏五月宋人及楚人平六月

癸卯晉師滅赤狄潞氏以潞子嬰兒歸秦人伐晉王札

子殺召伯毛伯秋螽仲孫蔑會齊高固于無婁初稅畝

冬螽生饑

無婁公羊作牟婁

十有六年春王正月晉人滅赤

狄甲氏及雷吁夏成周宣榭火秋鄭伯姬來歸冬大有

年

○榘本又作謝
火公穀並作災

十有七年春王正月庚子許男錫

我卒丁未蔡侯申卒夏葬許昭公葬蔡文公六月癸卯

日有食之己未公會晉侯衛侯曹伯邾子同盟于斷道

秋公至自會冬十有一月壬午公弟叔肸卒 十有八

年春晉侯衛世子臧伐齊公伐杞夏四月秋七月邾人

戕鄆子于鄆甲戌楚子旅卒公孫歸父如晉冬十月壬

戌公薨于路寢歸父還自晉至筮遂奔齊

○旅穀梁作
呂筮公穀並

作

成公元年春王正月公即位二月辛酉葬我君宣

公無冰三月作丘甲夏滅孫許及晉侯盟于赤棘秋王

師敗績于茅戎冬十月

○茅公穀並作貿

二年春齊侯伐我

北鄙夏四月丙戌衛孫良夫帥師及齊師戰于新築衛
師敗績六月癸酉季孫行父滅孫許叔孫僑如公孫嬰
齊帥師會晉郤克衛孫良夫曹公子首及齊侯戰于鞏
齊師敗績秋七月齊侯使國佐如師己酉及國佐盟于
袁婁八月壬午宋公鮑卒庚寅衛侯速卒取汶陽田冬
楚師鄭師侵衛十有一月公會楚公子嬰齊于蜀丙申

公及楚人秦人宋人陳人衛人鄭人齊人曹人邾人薛

人鄆人盟于蜀

○曹公子首公穀並作手
袁穀梁作爰速公羊作遯

三年春王

正月公會晉侯宋公衛侯曹伯伐鄭辛亥葬衛穆公二

月公至自伐鄭甲子新宮災三日哭乙亥葬宋文公夏

公如晉鄭公子去疾帥師伐許公至自晉秋叔孫僑如

帥師圍棘大雩晉郤克衛孫良夫伐廬咎如冬十有一

月晉侯使荀庚來聘衛侯使孫良夫來聘丙午及荀庚

盟丁未及孫良夫盟鄭伐許

○廬公羊作
將穀梁作牆

四年春宋

公使華元來聘三月壬申鄭伯堅卒杞伯來朝夏四月
甲寅滅孫許卒公如晉葬鄭襄公秋公至自晉冬城鄆
鄭伯伐許 五年春王正月杞叔姬來歸仲孫蔑如宋
夏叔孫僑如會晉荀首于穀梁山崩秋大水冬十有一
月己酉天王崩十有二月己丑公會晉侯齊侯宋公衛
侯鄭伯曹伯邾子杞伯同盟于蟲牢 六年春王正月
公至自會二月辛巳立武宮取鄆衛孫良夫帥師侵宋
夏六月邾子來朝公孫嬰齊如晉壬申鄭伯費卒秋仲

孫蔑叔孫僑如帥師侵宋楚公子嬰齊帥師伐鄭冬季
孫行父如晉晉欒書帥師救鄭 七年春王正月鼯鼠
食郊牛角改卜牛鼯鼠又食其角乃免牛吳伐鄭夏五
月曹伯來朝不郊猶三望秋楚公子嬰齊帥師伐鄭公
會晉侯齊侯宋公衛侯曹伯莒子邾子杞伯救鄭八月
戊辰同盟于馬陵公至自會吳入州來冬大雩衛孫林
父出奔晉 八年春晉侯使韓穿來言汶陽之田歸之
于齊晉欒書帥師侵蔡公孫嬰齊如莒宋公使華元來

聘夏宋公使公孫壽來納幣晉殺其大夫趙同趙括秋七月天子使召伯來賜公命冬十月癸卯杞叔姬卒晉侯使士燮來聘叔孫僑如會晉士燮齊人邾人伐鄭衛人來

媵

○賜公穀並作錫

九年春王正月杞伯來逆叔姬之喪以

歸公會晉侯齊侯宋公衛侯鄭伯曹伯莒子杞伯同盟于蒲公至自會二月伯姬歸于宋夏季孫行父如宋致女晉人來媵秋七月丙子齊侯無野卒晉人執鄭伯晉欒書帥師伐鄭冬十有一月葬齊頃公楚公子嬰齊帥

師伐莒庚申莒潰楚人入鄆秦人白狄伐晉鄭人圍許城中城十年春衛侯之弟黑背帥師侵鄭夏四月五

卜郊不從乃不郊五月公會晉侯齊侯宋公衛侯曹伯

伐鄭齊人來媵丙午晉侯孺卒秋七月公如晉冬十月

十有一年春王三月公至自晉晉侯使卻曄來聘已

丑及卻曄盟夏季孫行父如晉秋叔孫僑如如齊冬十

月○曄公
羊作州十有二年春周公出奔晉夏公會晉侯衛

侯于瑣澤秋晉人敗狄于交剛冬十月○瑣公
羊作沙十有

三年春晉侯使卻錡來乞師三月公如京師夏五月公自京師遂會晉侯齊侯宋公衛侯鄭伯曹伯邾人滕人伐秦曹伯盧卒于師秋七月公至自伐秦冬葬曹宣公

○穀梁會晉侯下無齊侯盧公穀並作盧

十有四年春王正月莒子朱卒

夏衛孫林父自晉歸于衛秋叔孫僑如如齊逆女鄭公子喜帥師伐許九月僑如以夫人婦姜氏至自齊冬十月庚寅衛侯滅卒秦伯卒十有五年春王二月葬衛定公三月乙巳仲嬰齊卒癸丑公會晉侯衛侯鄭伯曹

伯宋世子成齊國佐邾人同盟于戚晉侯執曹伯歸于
京師公至自會夏六月宋公固卒楚子伐鄭秋八月庚
辰葬宋共公宋華元出奔晉宋華元自晉歸于宋宋殺
其大夫山宋魚石出奔楚冬十有一月叔孫僑如會晉
士燮齊高無咎宋華元衛孫林父鄭公子鮑邾人會吳
子鍾離許遷于葉○歸于公羊
作歸之于十有六年春王正月
雨木冰夏四月辛未滕子卒鄭公子喜帥師侵宋六月
丙寅朔日有食之晉侯使欒黶來乞師甲午晦晉侯及

楚子鄭伯戰于鄢陵楚子鄭師敗績楚殺其大夫公子
側秋公會晉侯齊侯衛侯宋華元邾人于沙隨不見公
公至自會公會尹子晉侯齊國佐邾人伐鄭曹伯歸自
京師九月晉人執季孫行父舍之于茗丘冬十月乙亥
叔孫僑如出奔齊十有二月乙丑季孫行父及晉郤欒
盟于扈公至自會乙酉刺公子偃○茗公
羊作招十有七年
春衛北宮括帥師侵鄭夏公會尹子單子晉侯齊侯宋
公衛侯曹伯邾人伐鄭六月乙酉同盟于柯陵秋公至

自會齊高無咎出奔莒九月辛丑用郊晉侯使荀瑩來
乞師冬公會單子晉侯宋公衛侯曹伯齊人邾人伐鄭
十有一月公至自伐鄭壬申公孫嬰齊卒于狸脈十有
二月丁巳朔日有食之邾子貜且卒晉殺其大夫卻錡

卻犇卻至楚人滅舒庸

○脈公羊作軫穀梁作蜃

十有八年春王

正月晉殺其大夫胥童庚申晉弑其君州蒲齊殺其大
夫國佐公如晉夏楚子鄭伯伐宋宋魚石復入于彭城
公至自晉晉侯使士匄來聘秋杞伯來朝八月邾子來

朝築鹿囿己丑公薨于路寢冬楚人鄭人侵宋晉侯使士魴來乞師十有二月仲孫蔑會晉侯宋公衛侯邾子齊崔杼同盟于虛打丁未葬我君成公

魴公羊作彭

襄公

元年春王正月公即位仲孫蔑會晉欒黶宋華元衛甯殖曹人莒人邾人滕人薛人圍宋彭城夏晉韓厥帥師伐鄭仲孫蔑會齊崔杼曹人邾人杞人次于鄆秋楚公子壬夫帥師侵宋九月辛酉天王崩邾子來朝冬衛侯使公孫剽來聘晉侯使荀瑩來聘

○厥公羊作屈鄭公羊作合

二

年春王正月葬簡王鄭師伐宋夏五月庚寅夫人姜氏薨六月庚辰鄭伯踰卒晉師宋師衛甯殖侵鄭秋七月仲孫蔑會晉荀瑩宋華元衛孫林父曹人邾人于戚已丑葬我小君齊姜叔孫豹如宋冬仲孫蔑會晉荀瑩齊崔杼宋華元衛孫林父曹人邾人滕人薛人小邾人于戚遂城虎牢楚殺其大夫公子申三年春楚公子嬰齊帥師伐吳公如晉夏四月壬戌公及晉侯盟于長樗公至自晉六月公會單子晉侯宋公衛侯鄭伯莒子邾

子齊世子光己未同盟于雞澤陳侯使袁僑如會戊寅
叔孫豹及諸侯之大夫及陳袁僑盟秋公至自會冬晉
荀瑩帥師伐許 四年春王三月己酉陳侯午卒夏叔

孫豹如晉秋七月戊子夫人妣氏薨葬陳成公八月辛

亥葬我小君定姒冬公如晉陳人圍頓

○妣公
羊作弋

五年

春公至自晉夏鄭伯使公子發來聘叔孫豹鄆世子巫
如晉仲孫蔑衛孫林父會吳于善道秋大雩楚殺其大
夫公子壬夫公會晉侯宋公陳侯衛侯鄭伯曹伯莒子

邾子滕子薛伯齊世子光吳人鄫人于戚公至自會冬
成陳楚公子貞帥師伐陳公會晉侯宋公衛侯鄭伯曹
伯齊世子光救陳十有二月公至自救陳辛未季孫行

父卒

○道公穀並作稻曹伯下公穀俱有莒子邾子滕子薛伯

六年春王三月壬

午杞伯姑容卒夏宋華弱來奔秋葬杞桓公滕子來朝
莒人滅鄫冬叔孫豹如邾季孫宿如晉十有二月齊侯
滅萊七年春邾子來朝夏四月三卜郊不從乃免牲
小邾子來朝城費秋季孫宿如衛八月螽冬十月衛侯

使孫林父來聘壬戌及孫林父盟楚公子貞帥師圍陳

十有二月公會晉侯宋公陳侯衛侯曹伯莒子邾子于

鄆鄭伯髡頑如會未見諸侯丙戌卒于鄆陳侯逃歸頑

公穀並作原鄆

八年春王正月公如晉夏葬鄭僖公

公穀並作操

鄭人侵蔡獲蔡公子燮季孫宿會晉侯鄭伯齊人宋人

衛人邾人于邢丘公至自晉莒人伐我東鄙秋九月大

雩冬楚公子貞帥師伐鄭晉侯使士匄來聘九年春

宋災夏季孫宿如晉五月辛酉夫人姜氏薨秋八月癸

未葬我小君穆姜冬公會晉侯宋公衛侯曹伯莒子邾

子滕子薛伯杞伯小邾子齊世子光伐鄭十有二月己

亥同盟于戲楚子伐鄭

○災公
羊作火

十年春公會晉侯宋

公衛侯曹伯莒子邾子滕子薛伯杞伯小邾子齊世子

光會吳子柎夏五月甲午遂滅偃陽公至自會楚公子

貞鄭公孫輒帥師伐宋晉師伐秦秋莒人伐我東鄙公

會晉侯宋公衛侯曹伯莒子邾子齊世子光滕子薛伯

杞伯小邾子伐鄭冬盜殺鄭公子騂公子發公孫輒戍

鄭虎牢楚公子貞帥師救鄭公至自伐鄭

○偏穀梁作傳駢公穀並

作斐

十有一年春王正月作三軍夏四月卜郊不從

乃不郊鄭公孫舍之帥師侵宋公會晉侯宋公衛侯曹

伯齊世子光莒子邾子滕子薛伯杞伯小邾子伐鄭秋

七月己未同盟于亳城北公至自伐鄭楚子鄭伯伐宋

公會晉侯宋公衛侯曹伯齊世子光莒子邾子滕子薛

伯杞伯小邾子伐鄭會于蕭魚公至自會楚人執鄭行

入良霄冬秦人伐晉

○亳公穀並作京霄穀梁作宵

十有二年春王

三月莒人伐我東鄙圍台季孫宿帥師救台遂入鄆夏

晉侯使士魴來聘秋九月吳子乘卒冬楚公子貞帥師

侵宋公如晉

○台穀梁
俱作郕

十有三年春公至自晉夏取

郕秋九月庚辰楚子審卒冬城防

○郕公
羊作詩

十有四年

春王正月季孫宿叔老會晉士匄齊人宋人衛人鄭公

孫薑曹人莒人邾人滕人薛人杞人小邾人會吳子向

二月乙未朔日有食之夏四月叔孫豹會晉荀偃齊人

宋人衛北宮括鄭公孫薑曹人莒人邾人滕人薛人杞

人小邾人伐秦己未衛侯出奔齊莒人侵我東鄙秋楚公子貞帥師伐吳冬季孫宿會晉士匄宋華閱衛孫林父鄭公孫薑莒人邾人于戚

○莒公羊俱作囁衛侯下公羊有衍字

十

有五年春宋公使向戌來聘二月己亥及向戌盟于劉劉夏逆王后于齊夏齊侯伐我北鄙圍成公救成至遇季孫宿叔孫豹帥師城成郭秋八月丁巳日有食之邾人伐我南鄙冬十有一月癸亥晉侯周卒十有六年春王正月葬晉悼公三月公會晉侯宋公衛侯鄭伯曹

伯莒子邾子薛伯杞伯小邾子于溴梁戊寅大夫盟晉
人執莒子邾子以歸齊侯伐我北鄙夏公至自會五月
甲子地震叔老會鄭伯晉荀偃衛甯殖宋人伐許秋齊
侯伐我北鄙圍郕大雩冬叔孫豹如晉

○郕公穀
並作成

十

有七年春王二月庚午邾子貜卒宋人伐陳夏衛石買

帥師伐曹秋齊侯伐我北鄙圍桃高厚帥師伐我北鄙

圍防九月大雩宋華臣出奔陳冬邾人伐我南鄙

○貜
公穀

並作闕挑公羊作洮高
厚上公穀俱有齊字

十有八年春白狄來夏晉人

執衛行人石買秋齊師伐我北鄙冬十月公會晉侯宋

公衛侯鄭伯曹伯莒子邾子滕子薛伯杞伯小邾子同

圍齊曹伯負芻卒于師楚公子午帥師伐鄭

○齊師穀梁作齊侯

十有九年春王正月諸侯盟于祝柯晉人執邾子公

至自伐齊取邾田自鄆水季孫宿如晉葬曹成公夏衛

孫林父帥師伐齊秋七月辛卯齊侯環卒晉士匄帥師

侵齊至穀聞齊侯卒乃還八月丙辰仲孫蔑卒齊殺其

大夫高厚鄭殺其大夫公子嘉冬葬齊靈公城西郭叔

孫豹會晉士句于柯城武城

○祝柯之柯公羊作阿環公羊作瑗嘉公羊作喜

二十年春王正月辛亥仲孫速會莒人盟于向夏六

月庚申公會晉侯齊侯宋公衛侯鄭伯曹伯莒子邾子

滕子薛伯杞伯小邾子盟于澶淵秋公至自會仲孫速

帥師伐邾蔡殺其大夫公子燮蔡公子履出奔楚陳侯

之弟黃出奔楚叔老如齊冬十月丙辰朔日有食之季

孫宿如宋

○速公羊作邀下同燮穀梁作湑黃公穀並作光

二十有一年春

王正月公如晉邾庶其以漆閭丘來奔夏公至自晉秋

晉欒盈出奔楚九月庚戌朔日有食之冬十月庚辰朔
日有食之曹伯來朝公會晉侯齊侯宋公衛侯鄭伯曹
伯莒子邾子于商任二十有二年春王正月公至自
會夏四月秋七月辛酉叔老卒冬公會晉侯齊侯宋公
衛侯鄭伯曹伯莒子邾子薛伯杞伯小邾子于沙隨公
至自會楚殺其大夫公子追舒○邾子下公
穀俱有滕子二十有
三年春王二月癸酉朔日有食之三月己巳杞伯勾卒
夏邾畀我來奔葬杞孝公陳殺其大夫慶虎及慶寅陳

侯之弟黃自楚歸于陳晉欒盈復入于晉入于曲沃秋
齊侯伐衛遂伐晉八月叔孫豹帥師救晉次于雍榆巳
卯仲孫速卒冬十月乙亥臧孫紇出奔邾晉人殺欒盈

齊侯襲莒

○昇公羊作鼻
榆公穀並作渝

二十有四年春叔孫豹如

晉仲孫羯帥師侵齊夏楚子伐吳秋七月甲子朔日有
食之既齊崔杼帥師伐莒大水八月癸巳朔日有食之
公會晉侯宋公衛侯鄭伯曹伯莒子邾子滕子薛伯杞
伯小邾子于夷儀冬楚子蔡侯陳侯許男伐鄭公至自

會陳鍼宜咎出奔楚叔孫豹如京師大饑

○夷儀公羊作陳儀下同

二十有五年春齊崔杼帥師伐我北鄙夏五月乙亥

齊崔杼弑其君光公會晉侯宋公衛侯鄭伯曹伯莒子

邾子滕子薛伯杞伯小邾子于夷儀六月壬子鄭公孫

舍之帥師入陳秋八月己巳諸侯同盟于重丘公至自

會衛侯入于夷儀楚屈建帥師滅舒鳩冬鄭公孫夏帥

師伐陳十有二月吳子遏伐楚門于巢卒

○公孫夏之夏公羊作囁

遏公穀並作謁

二十有六年春王二月辛卯衛甯喜弑其君

剽衛孫林父入于戚以叛甲午衛侯衎復歸于衛夏晉
侯使荀吳來聘公會晉人鄭良霄宋人曹人于澶淵秋
宋公殺其世子痤晉人執衛甯喜八月壬午許男甯卒
于楚冬楚子蔡侯陳侯伐鄭葬許靈公

○ 痤 穀
梁作 座

二十

有七年春齊侯使慶封來聘夏叔孫豹會晉趙武楚屈
建蔡公孫歸生衛石惡陳孔魚鄭良霄許人曹人于宋
衛殺其大夫甯喜衛侯之弟鱄出奔晉秋七月辛巳豹
及諸侯之大夫盟于宋冬十有二月乙亥朔日有食之

○與公羊作瑗
鱗穀梁作專

二十有八年春無冰夏衛石惡出奔

晉邾子來朝秋八月大雩仲孫羯如晉冬齊慶封來奔
十有一月公如楚十有二月甲寅天王崩乙未楚子昭
卒二十有九年春王正月公在楚夏五月公至自楚
庚午衛侯衎卒閹弑吳子餘祭仲孫羯會晉荀盈齊高
止宋華定衛世叔儀鄭公孫段曹人莒人滕人薛人小
邾人城杞晉侯使士鞅來聘杞子來盟吳子使札來聘
秋九月葬衛獻公齊高止出奔北燕冬仲孫羯如晉○
儀

公羊作齊莒人下
公穀俱有邾人

三十年春王正月楚子使薳罷來

聘夏四月蔡世子般弑其君固五月甲午宋災宋伯姬
卒天王殺其弟佞夫王子瑕奔晉秋七月叔弓如宋葬
宋共姬鄭良霄出奔許自許入于鄭鄭人殺良霄冬十
月葬蔡景公晉人齊人宋人衛人鄭人曹人莒人邾人
滕人薛人杞人小邾人會于澶淵宋災故

○罷公羊作
頗伯姬上公

穀俱無宋字佞公羊作
年共姬上穀梁無宋字

三十有一年春王正月夏六

月辛巳公薨于楚宮秋九月癸巳子野卒巳亥仲孫羯

卒冬十月滕子來會葬癸酉葬我君襄公十有一月莒
人弑其君密州 昭公元年春王正月公即位叔孫豹
會晉趙武楚公子圍齊國弱宋向戌衛齊惡陳公子招
蔡公孫歸生鄭罕虎許人曹人于號三月取鄆夏秦伯
之弟鍼出奔晉六月丁巳邾子華卒晉荀吳帥師敗狄
于大鹵秋莒去疾自齊入于莒莒展輿出奔吳叔弓帥
師疆鄆田葬邾悼公冬十有一月己酉楚子麇卒楚公
子比出奔晉

○國弱公羊作國酌後同齊惡公羊作石
惡罕虎公羊作軒虎後同號公羊作鄆穀

梁作郭大鹵公穀並作大原莒展
下公穀俱無輿字麋公穀並作卷

二年春晉侯使韓

起來聘夏叔弓如晉秋鄭殺其大夫公孫黑冬公如晉

至河乃復季孫宿如晉 三年春王正月丁未滕子原

卒夏叔弓如滕五月葬滕成公秋小邾子來朝八月大

雩冬大雨雹北燕伯款出奔齊

原公
羊作泉

四年春王正

月大雨雹夏楚子蔡侯陳侯鄭伯許男徐子滕子頓子

胡子沈子小邾子宋世子佐淮夷會于申楚子執徐子

秋七月楚子蔡侯陳侯許男頓子胡子沈子淮夷伐吳

執齊慶封殺之遂滅賴九月取鄆冬十有二月乙卯叔

孫豹卒

○電公穀並作雪楚子執徐子穀梁作楚人賴公穀並作厲

五年春王正

月舍中軍楚殺其大夫屈申公如晉夏莒牟夷以牟婁

及防茲來奔秋七月公至自晉戊辰叔弓帥師敗莒師

于蚡泉秦伯卒冬楚子蔡侯陳侯許男頓子沈子徐人

越人伐吳

○蚡公羊作潰穀梁作賁

六年春王正月杞伯益姑卒

葬秦景公夏季孫宿如晉葬杞文公宋華合比出奔衛

秋九月大雩楚遠罷帥師伐吳冬叔弓如楚齊侯伐北

燕 七年春王正月暨齊平三月公如楚叔孫婼如齊

涖盟夏四月甲辰朔日有食之秋八月戊辰衛侯惡卒

九月公至自楚冬十有一月癸未季孫宿卒十有二月

癸亥葬衛襄公

○婼公羊作舍後同

八年春陳侯之弟招殺陳

世子偃師夏四月辛丑陳侯溺卒叔弓如晉楚人執陳

行人干徵師殺之陳公子畱出奔鄭秋蒐于紅陳人殺

其大夫公子過大雩冬十月壬午楚師滅陳執陳公子

招放之于越殺陳孔貞葬陳哀公

○貞公羊作瑗

九年春叔

子會楚子于陳許遷于夷夏四月陳災秋仲孫矍如齊

冬築郎囿

○災公穀
並作火

十年春王正月夏齊欒施來奔

秋七月季孫意如叔弓仲孫矍帥師伐莒戊子晉侯彪

卒九月叔孫婼如晉葬晉平公十有二月甲子宋公成

卒

○齊公羊作晉意如公羊作隱如
後同是年脫冬字成公羊作戊

十有一年春王

二月叔弓如宋葬宋平公夏四月丁巳楚子虔誘蔡侯

般殺之于申楚公子棄疾帥師圍蔡五月甲申夫人歸

氏薨大蒐于比蒲仲孫矍會邾子盟于稷祥秋季孫意

如會晉韓起齊國弱宋華亥衛北宮佗鄭罕虎曹人杞

人于厥慙九月己亥葬我小君齊歸冬十有一月丁酉

楚師滅蔡執蔡世子有以歸用之

○二月公羊作正月
侵祥公羊作侵羊厥

慙公羊作屈銀
有穀梁作友

十有二年春齊高偃帥師納北燕伯

于陽三月壬申鄭伯嘉卒夏宋公使華定來聘公如晉

至河乃復五月葬鄭簡公楚殺其大夫成熊秋七月冬

十月公子慙出奔齊楚子伐徐晉伐鮮虞

○熊公羊作
然穀梁作虎

慙公羊
作整

十有三年春叔弓帥師圍費夏四月楚公子

比自晉歸于楚弑其君虔于乾谿楚公子棄疾殺公子
比秋公會劉子晉侯齊侯宋公衛侯鄭伯曹伯莒子邾
子滕子薛伯杞伯小邾子于平丘八月甲戌同盟于平
丘公不與盟晉人執季孫意如以歸公至自會蔡侯廬
歸于蔡陳侯吳歸于陳冬十月葬蔡靈公公如晉至河
乃復吳滅州來○谿穀梁作溪殺公子比公羊作弑十有四年春意如
至自晉三月曹伯滕卒夏四月秋葬曹武公八月莒子
去疾卒冬莒殺其公子意恢十有五年春王正月吳

子夷末卒二月癸酉有事于武宮籥人叔弓卒去樂卒

事夏蔡朝吳出奔鄭六月丁巳朔日有食之秋晉荀吳

帥師伐鮮虞冬公如晉

○末公羊作昧朝公羊作昭奔上公羊無出字

十有

六年春齊侯伐徐楚子誘戎蠻子殺之夏公至自晉秋

八月己亥晉侯夷卒九月大雩季孫意如如晉冬十月

葬晉昭公

○蠻公羊作曼後同

十有七年春小邾子來朝夏六

月甲戌朔日有食之秋鄭子來朝八月晉荀吳帥師滅

陸渾之戎冬有星孛于大辰楚人及吳戰于長岸

○陸渾之

戎公羊作賁渾
公穀俱無之字

十有八年春王二月曹伯須卒夏五

月壬午宋衛陳鄭災六月邾人入鄆秋葬曹平公冬許

遷于白羽 十有九年春宋公伐邾夏五月戊辰許世

子止弑其君買己卯地震秋齊高發帥師伐莒冬葬許

悼公 二十年春王正月夏曹公孫會自鄆出奔宋秋

盜殺衛侯之兄縶冬十月宋華亥向寧華定出奔陳十

有一月辛卯蔡侯廬卒

○鄆穀梁作夢縶公穀並
作輒寧公羊作甯下同

二

十有一年春王三月葬蔡平公夏晉侯使士鞅來聘宋

華亥向寧華定自陳入于宋南里以叛秋七月壬午朔

日有食之八月乙亥叔輒卒冬蔡侯朱出奔楚公如晉

至河乃復

○叛公羊作畔輒公
羊作痊朱穀梁作東

二十有二年春齊侯

伐莒宋華亥向寧華定自宋南里出奔楚大蒐于昌閒

夏四月乙丑天王崩六月叔鞅如京師葬景王王室亂

劉子單子以王猛居于皇秋劉子單子以王猛入于王

城冬十月王子猛卒十有二月癸酉朔日有食之

○開公羊

姦作

二十有三年春王正月叔孫婼如晉癸丑叔鞅卒

晉人執我行人叔孫婼晉人圍郊夏六月蔡侯東國卒
于楚秋七月莒子庚輿來奔戊辰吳敗頓胡沈蔡陳許
之師于雞父胡子髡沈子逞滅獲陳夏馮天王居于狄

泉尹氏立王子朝八月乙未地震冬公如晉至河有疾

乃復

○父穀梁作甫逞公羊作楹穀梁作盈至河下公穀俱有公字

二十有四年春

王二月丙戌仲孫貜卒婼至自晉夏五月乙未朔日有
食之秋八月大雩丁酉杞伯郁釐卒冬吳滅巢葬杞平

公

○婼至自晉公羊作叔孫舍至自晉郁公羊作鬱

二十有五年春叔孫婼

如宋夏叔詣會晉趙鞅宋樂大心衛北宮喜鄭游吉曹
人邾人滕人薛人小邾人于黃父有鸛鵒來巢秋七月
上辛大雩季辛又雩九月己亥公孫于齊次于陽州齊
侯唁公于野井冬十月戊辰叔孫婁卒十有一月己亥
宋公佐卒于曲棘十有二月齊侯取鄆

○詣公穀並作
倪下同大心公

羊作世心下同鸛公羊作鸛九月
己亥公羊作乙亥陽公羊作揚

二十有六年春王

正月葬宋元公三月公至自齊居于鄆夏公圍成秋公
會齊侯莒子邾子杞伯盟于鄆陵公至自會居于鄆九

月庚申楚子居卒冬十月天王入于成周尹氏召伯毛

伯以王子朝奔楚

○郭公
羊作剗

二十有七年春公如齊公

至自齊居于鄆夏四月吳弑其君僚楚殺其大夫卻宛

秋晉士鞅宋樂祁犁衛北宮喜曹人邾人滕人會于扈

冬十月曹伯午卒邾快來奔公如齊公至自齊居于鄆

○卻穀
梁作郛

二十有八年春王三月葬曹悼公公如晉次

于乾侯夏四月丙戌鄭伯寧卒六月葬鄭定公秋七月

癸巳滕子寧卒冬葬滕悼公

○寧公羊
俱作甯

二十有九年

春公至自乾侯居于鄆齊侯使高張來唁公公如晉次
于乾侯夏四月庚子叔詣卒秋七月冬十月鄆潰 三
十年春王正月公在乾侯夏六月庚辰晉侯去疾卒秋
八月葬晉頃公冬十有二月吳滅徐徐子章禹奔楚○

公穀並
作羽

三十有一年春王正月公在乾侯季孫意如

會晉荀躒于適歷夏四月丁巳薛伯穀卒晉侯使荀躒

唁公于乾侯秋葬薛獻公冬黑肱以濫來奔十有二月

辛亥朔日有食之○

躒公穀並作
標肱公羊作弓

三十有二年春王

正月公在乾侯取闕夏吳伐越秋七月冬仲孫何忌會
晉韓不信齊高張宋仲幾衛世叔申鄭國參魯人莒人
薛人杞人小邾人城成周十有二月己未公薨于乾侯
○世叔穀梁作大叔莒人下
公羊有邾婁人穀梁有邾人定公元年春王三月晉

人執宋仲幾于京師夏六月癸亥公之喪至自乾侯戊
辰公即位秋七月癸巳葬我君昭公九月大雩立煬宮
冬十月隕霜殺菽二年春王正月夏五月壬辰雉門
及兩觀災秋楚人伐吳冬十月新作雉門及兩觀三

年春王正月公如晉至河乃復二月辛卯邾子穿卒夏

四月秋葬邾莊公冬仲孫何忌及邾子盟于拔

○拔公
羊作拔

四年春王二月癸巳陳侯吳卒三月公會劉子晉侯

宋公蔡侯衛侯陳子鄭伯許男曹伯莒子邾子頓子胡

子滕子薛伯杞伯小邾子齊國夏于召陵侵楚夏四月

庚辰蔡公孫姓帥師滅沈以沈子嘉歸殺之五月公及

諸侯盟于臯鼬杞伯成卒于會六月葬陳惠公許遷于

容城秋七月公至自會劉卷卒葬杞悼公楚人圍蔡晉

士鞅衛孔圉帥師伐鮮虞葬劉文公冬十有一月庚午

蔡侯以吳子及楚人戰于柏舉楚師敗績楚囊瓦出奔

鄭庚辰吳入郢

○公孫姓公羊姓上有歸字後同臯鼬公羊作浩油成公羊作戊圉公羊作圖

拍舉公羊作柏莒穀梁作伯舉郢公穀並作楚

五年春王三月辛亥朔日有

食之夏歸粟于蔡於越入吳六月丙申季孫意如卒秋

七月壬子叔孫不敢卒冬晉士鞅帥師圍鮮虞

○三月公羊作

正月六年春王正月癸亥鄭游速帥師滅許以許男斯

歸二月公侵鄭公至自侵鄭夏季孫斯仲孫何忌如晉

秋晉人執宋行人樂祁犁冬城中城季孫斯仲孫忌帥

師圍鄆

○連公羊作邈後同

七年春王正月夏四月秋齊侯鄭

伯盟于鹹齊人執衛行人北宮結以侵衛齊侯衛侯盟

于沙大雩齊國夏帥師伐我西鄙九月大雩冬十月

沙○

下公羊有澤字

八年春王正月公侵齊公至自侵齊二月公

侵齊三月公至自侵齊曹伯露卒夏齊國夏帥師伐我

西鄙公會晉師于瓦公至自瓦秋七月戊辰陳侯柳卒

晉士鞅帥師侵鄭遂侵衛葬曹靖公九月葬陳懷公季

孫斯仲孫何忌帥師侵衛冬衛侯鄭伯盟于曲濮從祀

先公盜竊寶王大弓九年春王正月夏四月戊申鄭

伯蠆卒得寶王大弓六月葬鄭獻公秋齊侯衛侯次于

五氏秦伯卒冬葬秦哀公

蠆公
羊作蠆

十年春王三月及

齊平夏公會齊侯于夾谷公至自夾谷晉趙鞅帥師圍

衛齊人來歸鄆謹龜陰田叔孫州仇仲孫何忌帥師圍

邱秋叔孫州仇仲孫何忌帥師圍邱宋樂大心出奔曹

宋公子地出奔陳冬齊侯衛侯鄭游速會于安甫叔孫

州仇如齊宋公之弟辰暨仲佗石彊出奔陳

○夾谷公穀並作頰

谷田上穀梁有之字秋圉邱之邱公羊作費地公羊作池後同安甫公羊作輦暨字下公穀俱有宋字

十有一年春宋公之弟辰及仲佗石彊公子地自陳入

于蕭以叛夏四月秋宋樂大心自曹入于蕭冬及鄭平

叔還如鄭泣盟

十有二年春薛伯定卒夏葬薛襄公

叔孫州仇帥師墮郕衛公孟彊帥師伐曹季孫斯仲孫

何忌帥師墮費秋大雩冬十月癸亥公會齊侯盟于黃

十月一月丙寅朔日有食之公至自黃十有二月公圍

成公至自圍成

○齊侯公羊作晉侯誤也

十有三年春齊侯衛侯

次于垂葭夏築蛇淵圃大蒐于比蒲衛公孟彊帥師伐

曹秋晉趙鞅入于晉陽以叛冬晉荀寅士吉射入于朝

歌以叛晉趙鞅歸于晉薛弑其君比

○齊侯下穀梁無衛侯葭公羊作瑕

荀寅下公羊有及字

十有四年春衛公叔戌來奔衛趙陽出奔

宋二月辛巳楚公子結陳公孫佗人帥師滅頓以頓子

牂歸夏衛北宮結來奔五月於越敗吳于檇李吳子光

卒公會齊侯衛侯于牽公至自會秋齊侯宋公會于洮

天王使石尚來歸賑衛世子蒯聩出奔宋衛公孟彊出

奔鄭宋公之弟辰自蕭來奔大蒐于比蒲邾子來會公

城莒父及霄

○衛趙陽公穀並作晉趙陽二月公羊作三月陳公孫公羊作公子翬公羊作膾攜

公羊作醉牽公羊作堅又作擊是年無冬闕文

十有五年春王正月邾子來

朝饁鼠食郊牛牛死改卜牛二月辛丑楚子滅胡以胡

子豹歸夏五月辛亥郊壬申公薨于高寢鄭罕達帥師

伐宋齊侯衛侯次于渠蔭邾子來奔喪秋七月壬申似

氏卒八月庚辰朔日有食之九月滕子來會葬丁巳葬

我君定公雨不克葬戊午日下昃乃克葬辛巳葬定姒

冬城漆

○ 罕公羊作軒後同渠蔭公羊作蓮蔭姒穀梁作弋昃穀梁作搜

哀公元年

春王正月公即位楚子陳侯隨侯許男圍蔡麇鼠食郊

牛改卜牛夏四月辛巳郊秋齊侯衛侯伐晉冬仲孫何

忌帥師伐邾

○ 郊牛下穀梁有角字

二年春王二月季孫斯叔

孫州仇仲孫何忌帥師伐邾取鄆東田及沂西田癸巳

叔孫州仇仲孫何忌及邾子盟于句繹夏四月丙子衛

侯元卒滕子來朝晉趙鞅帥師納衛世子蒯聵于戚秋

八月甲戌晉趙鞅帥師及鄭罕達帥師戰于鐵鄭師敗

績冬十月葬衛靈公十有一月蔡遷于州來蔡殺其大

夫公子駟

○鐵公
羊作栗

三年春齊國夏衛石曼姑帥師圍

戚夏四月甲午地震五月辛卯桓宮僖宮災季孫斯叔

孫州仇帥師城啓陽宋樂髡帥師伐曹秋七月丙子季

孫斯卒蔡人放其大夫公孫獵于吳冬十月癸卯秦伯

卒叔孫州仇仲孫何忌帥師圍邾

○啓公
羊作開

四年春王

二月庚戌盜殺蔡侯申蔡公孫辰出奔吳葬秦惠公宋

人執小邾子夏蔡殺其大夫公孫姓公孫霍晉人執戎

蠻子赤歸于楚城西郭六月辛丑亳社災秋八月甲寅

滕子結卒冬十有二月葬蔡昭公葬滕頃公

○二月公羊作三月

盜殺之殺公穀並作弑亳公羊作蒲

五年春城毗夏齊侯伐宋晉趙鞅

帥師伐衛秋九月癸酉齊侯杵臼卒冬叔還如齊閏月

葬齊景公

○毗公羊作比杵公羊作處

六年春城邾瑕晉趙鞅帥

師伐鮮虞吳伐陳夏齊國夏及高張來奔叔還會吳于

柰秋七月庚寅楚子軫卒齊陽生入于齊齊陳乞弑其

君荼冬仲孫何忌帥師伐邾宋向巢帥師伐曹

○邾瑕公羊作

邾婁蒧荼公羊作舍

七年春宋皇瑗帥師侵鄭晉魏曼多帥師

侵衛夏公會吳于郕秋公伐邾八月己酉入邾以邾子

益來宋人圍曹冬鄭駟弘帥師救曹八年春王正月

宋公入曹以曹伯陽歸吳伐我夏齊人取讎及闡歸邾

子益于邾秋七月冬十有二月癸亥杞伯過卒齊人歸

讎及闡

○闡公羊作憚

九年春王二月葬杞僖公宋皇瑗帥

師取鄭師于雍丘夏楚人伐陳秋宋公伐鄭冬十月

十年春王二月邾子益來奔公會吳伐齊三月戊戌齊侯陽生卒夏宋人伐鄭晉趙鞅帥師侵齊五月公至自伐齊葬齊悼公衛公孟彊自齊歸于衛薛伯夷卒秋葬薛惠公冬楚公子結帥師伐陳吳救陳○夷公

羊作寅

十有

一年春齊國書帥師伐我夏陳轅頗出奔鄭五月公會

吳伐齊甲戌齊國書帥師及吳戰于艾陵齊師敗績獲

齊國書秋七月辛酉滕子虞母卒冬十有一月葬滕隱

公衛世叔齊出奔宋

○轅公
羊作袁

十有二年春用田賦夏

五月甲辰孟子卒公會吳于橐臯秋公會衛侯宋皇瑗

于鄆宋向巢帥師伐鄭冬十有二月螽

○鄆公羊作運

十有

三年春鄭罕達帥師取宋師于岳夏許男成卒公會晉

侯及吳子于黃池楚公子申帥師伐陳於越入吳秋公

至自會晉魏曼多帥師侵衛葬許元公九月螽冬十有

一月有星孛于東方盜殺陳夏區夫十有二月螽

○成公羊

作戌魏下公羊無曼字區公羊作疆

十有四年春西狩獲麟

○春秋止此自此以

下至十六年皆魯史記之文弟子欲存孔子卒故并錄以續孔子所修之經續經小邾射以句繹來奔夏四

月齊陳恒執其君寘于舒州庚戌叔還卒五月庚申朔日有食之陳宗豎出奔楚宋向魋入于曹以叛莒子狂卒六月宋向魋自曹出奔衛宋向巢來奔齊人弑其君壬子舒州秋晉趙鞅帥師伐衛八月辛丑仲孫何忌卒冬陳宗豎自楚復入于陳陳人殺之陳轅買出奔楚有星孛饑十有五年春王正月戊辰叛夏五月齊高無平出奔北燕鄭伯伐宋秋八月大雩晉趙鞅帥師伐衛冬晉侯伐鄭及齊平衛公孟彊出奔齊十有六年春王正月己卯衛世子蒯瞶自戚入于衛衛侯輒來奔二月衛子還成出奔宋夏四月己丑孔丘卒杜氏左傳序春秋者魯史記之名也記事者以事繫日以日繫月以月繫時以時繫年所以紀遠近別同異也故史之所記必表年以首事年有四時故錯舉以為所記之名也周禮有史官掌邦國四方之事達四方之志諸侯亦各有國史大事書之於策小事簡牘而已孟子曰楚謂之檮杌晉謂之乘而魯謂之春秋其實一也韓宣子適魯見

易象與魯春秋曰周禮盡在魯矣吾乃今知周公之德與周之所以王韓子所見蓋周之舊典禮經也周德既衰官失其守上之人不能使春秋昭明赴告策書諸所記注多違舊章仲尼因魯史策書成文考其真僞而志其典禮上以遵周公之遺制下以明將來之法其教之所存文之所害則刊而正之以示勸戒其餘則皆即用舊史史有文質辭有詳略不必改也故傳曰其善志又曰非聖人孰能修之蓋周公之志仲尼從而明之左丘明受經於仲尼以爲經者不刊之書也故傳或先經以始事或後經以終義或依經以辯理或錯經以合異隨義而發其例之所重舊史遺文略不盡舉非聖人所修之要故也身爲國史躬覽載籍必廣記而備言之其文緩其旨遠將令學者原始要終尋其技葉究其所窮優而柔之使自求之饜而飫之使自趨之若江海之浸膏澤之潤渙然冰釋怡然理順然後爲得也其發凡以言例皆經國之常制周公之垂法史書之舊章仲尼從而

修之以成一經之通體其微顯聞幽裁成義類者皆據舊例而發義指行事以正褒貶諸稱書不書先書故書不言不稱書曰之類皆所以起新舊發大義謂之變例然亦有史所不書卽以為義者此蓋春秋新意故傳不言凡曲而暢之也其經無義例因行事而言則傳直言其歸趣而已非例也故發傳之體有三而為例之情有五一日微而顯文見於此而起義在彼稱族尊君命舍族尊夫人梁亡城緣陵之類是也二曰志而晦約言示制推以知例參會不地與謀曰及之類是也三曰婉而成章曲從義訓以示大順諸所諱辟壁假許田之類是也四曰盡而不汙直書其事具文見意丹楨刻桷天王求車齊侯獻捷之類是也五曰懲惡而勸善求名而亡欲蓋而章書齊豹盜三叛人名之類是也推此五體以尋經傳觸類而長之附于二百四十二年行事王道之正人倫之紀備矣或曰春秋以錯文見義若如所論則經當有事同文異而無其義也先儒所傳皆不其然答

曰春秋雖以一字為褒貶然皆須數句以成言非如八卦之文可錯綜為六十四也固當依傳以為斷古今言左氏春秋者多矣今其遺文可見者十數家大體轉相祖述進不得為錯綜經文以盡其變退不守丘明之傳於丘明之傳有所不通皆沒而不說而更廣引公羊穀梁適足自亂預今所以為異專修丘明之傳以釋經經之條貫必出於傳傳之義例總歸諸凡推變例以正褒貶簡二傳而去異端蓋丘明之志也其有疑錯則備論而闕之以俟後賢然劉子駿創通大義賈景伯父子許惠卿皆蒐儒之吳者也末有賴子嚴者雖淺近亦復名家故特舉劉賈許穎之遠以見同異分經之年與傳之年相附比其義類各隨而解之名曰經傳集解又別集諸例及地名譜第歷數相與為部凡四十部十五卷皆顯其異同從而釋之名曰釋例將令學者觀其所聚異同之說釋例詳之也或曰春秋之作左傳及穀梁無明文說者以為仲尼自衛反魯修春秋立素王丘明為素

臣言公羊者亦云黜周而王魯危行言孫以辟當世之害故微其文隱其義公羊經止獲麟而左氏經終孔丘卒敢問所安答曰異乎余所聞仲尼曰文王既沒文不在茲乎此制作之本意也歎曰鳳鳥不至河不出圖吾已矣夫蓋傷時王之政也麟鳳五靈王者之嘉瑞也今麟出非其時虛其應而失其歸此聖人所以為感也絕筆於獲麟之一句者所感而起固所以為終也曰然則春秋何始於魯隱公答曰周平王東周之始王也隱公讓國之賢君也考乎其時則相接言乎其位則列國本乎其始則周公之祚胤也若平王能祈天永命紹開中興隱公能弘宣祖業光啓王室則西周之美可尋文武之迹不隊是故因其歷數附其行事采周之舊以會成王義垂法將來所書之王即平王也所用之歷即周正也所稱之公即魯隱也安在其黜周而王魯乎子曰如有用我者吾其為東周乎此其義也若夫制作之文所以彰往考來情見乎辭言高則旨遠辭約則意微此理

之常非隱之也聖人包周身之防既作之後方復隱諱以辟患非所聞也子路欲使門人為臣孔子以為欺天而云仲尼素王丘明素臣又非通論也先儒以為制作三年文成致麟既已妖妄又引經以至仲尼卒亦又近誣據公羊經止獲麟而左氏小邾射不在三叛之數故余以為感麟而作作起獲麟則文止於所起為得其實至於反袂拭面稱吾道窮亦無取焉

說苑孔子曰夏道不亡商德不作商德不亡周德不作周德不亡春秋不作春秋作而後君子知周道亡也故上下相虧也猶水火之相滅也人君不可不察而大盛其臣下此私門盛而公家毀也人君不察焉則國家危

殆矣

史記孔子曰六藝於治一也禮以節人樂以發和書以道事詩以達意易以神化春秋以道義

禮記孔子曰入其國其教可知也其為人也溫柔敦厚詩教也疏通知遠書教也廣博易良樂教也潔靜精微易教也恭儉莊敬禮教也屬辭比事春秋教也故詩之失愚書之失誣樂之失奢易之失賊禮之失煩春秋之失亂其為人也溫柔敦厚而不愚則深於詩者也疏通

知遠而不誣則深於書者也廣博易良而不奢則深於樂者也潔靜精微而不賊則深於易者也恭儉莊敬而不煩則深於禮者也屬辭比事而不亂則深於春秋者也

○經解 春秋演孔圖作法五經運之天地稽之圖象質於三王施之四海


家語齊太史子與適魯見孔子孔子與之言道子與說曰吾鄙人也聞子之名不覩子之形久矣而求知之寶貴也乃今而後知泰山之為高淵海之為大惜乎夫子之不逢明王道德不加于民而將垂寶以貽後世遂退

而謂南宮敬叔曰今孔子先聖之嗣自弗父何以來世有讓德天所祚也成湯以武德王天下其配在文殷宗以來未始有也孔子生於衰周先王典籍錯亂無紀而乃論百家之遺紀考正其義祖述堯舜憲章文武刪詩述書定禮理樂制作春秋讚明易道垂訓後嗣以為法式其文德著矣然凡所教誨東修以上三千餘人或者天將欲與素王之乎夫何其盛也敬叔曰殆如吾子之言夫物莫能兩大吾聞聖人之後而非繼世之統其必

有興者焉今夫子之道至矣乃將施之無窮雖欲辭天之祚故未得耳子貢聞之以二子之言告孔子子曰豈若是哉亂而治之滯而起之自吾志天何與焉

春秋演孔圖聖

人不空生必有所制以顯天心丘為木鐸制天下法



繹史卷八十六之三